



## Vrijednost riječi tevhida (Medina)

Hatib: dr. Ahmed ibn Ali el-Huzejfi

28. safer 1447. po Hidžri / 22. august 2025.

Svaka hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji druga nema, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i poslanik.

“O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!” (Ali Imran, 102)

“O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire.” (En-Nisa, 1)

“O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio.” (El-Ahzab, 70–71).

Poštovani vjernici, zaista je suština svih savjeta i njihova srž, te ostvarenje nada i postizanje ciljeva – u bogobojažnosti prema Allahu. Ona je središte i uzda svakog dobra, početak i kraj svakog uspjeha. Sretan je onaj koji se njome ogrne u svim svojim trenucima. Uzvišeni i Mudri kaže: “ O vi koji vjerujete, bojte se Allaha istinskom bogobojažnošću!” (Ali Imran, 102)

O vjernici i vjernice, najuzvišenija stvar koja može ispuniti srca, oživjeti tijela, koju jezik može izgovoriti, i u skladu s kojom tijelo može djelovati jesu riječi iskrenosti i tevhida: “La ilahe illallah!” – Nema istinskog boga osim Allaha!” To je istina koju je





Allah posvjedočio o Sebi, a učinio da je posvjedoče i najbolja Njegova stvorenja. Uzvišeni kaže:

“Allah svjedoči da nema drugog boga osim Njega – a i meleki i učenici – i da On postupa pravedno. Nema boga osim Njega, Silnog i Mudrog!” (Ali Imran, 18)

To je najuzvišenije, najpravednije, i najistinitije svjedočanstvo, od Najuzvišenijeg Svjedoka, o Najuzvišenijem predmetu svjedočenja.

To su riječi na kojima opstoje nebesa i Zemlja, i zbog kojih su stvorena sva stvorenja. Zbog njih je Allah poslao poslanike, objavio knjige, propisao vjerazakone. Zbog nje su postavljene pravedne vage, otvorene knjige (registri) djela, određena kibla, utemeljena vjera. To su riječi islama i ključ kuće spasa. One su Allahovo pravo kod svih obveznika, i za njih će Allah pitati prve i posljednje.

Te veličanstvene riječi “la ilahe illallah” znače da niko, ma koliko uzvišen bio njegov položaj i koliko bio poštovan u srcima stvorenja, ne zaslužuje nijedan oblik ibadeta, osim Onoga Koji posjeduje savršen i apsolutni rububijet (vlast, vlasništvo i upravljanje), a to je samo Allah, jer je On savršen u Svom Biću, Svojim atributima, djelima i imenima. Sve mimo Njega je ograničeno slabošću, potrebom i ovisnošću, stoga je On jedini dostojan da bude obožavan.

Kada razmotrimo ovo veličanstveno značenje ovih riječi, i njihov dubok trag, shvatimo da se upravo kroz njih postiže istinska sloboda čovjeka – oslobađanje od robovanja bilo kojem stvorenju. Vjernik priznaje samo jednog Boga, dostojnog obožavanja, i ne klanja se srcem, niti tijelom, ikome osim Njemu.

Ne obožava nikog osim svog Stvoritelja i Gospodara, tog Uzvišenog Boga Kojem se srca pokoravaju prije nego što Mu čela padnu na sedždu, i Kojem jezici i usta neprestano svjedoče božanstvenost i apsolutnu vlast.

To su riječi koje obuhvataju sve poruke s kojima su poslanici došli, i koje spajaju rububijet i uluhijet, kao što se grane drveća isprepliću i kao što se kapci očiju zatvaraju zajedno. Jer, rububijet podrazumijeva uluhijet, a uluhijet uključuje rububijet.





Kao što svjedočenje da nema boga osim Allaha (šehadet) podrazumijeva svjedočenje da je Muhammed, sallallahu alejhi ve sellem, Allahov rob i poslanik, jer prvi dio šehadeta, "la ilahe illallah", nije potpun bez drugog dijela šehadeta, "Muhammedun resulullah".

Ilah, Bog, je Onaj Koji zaslužuje da bude obožavan, Onaj Koji je dostojan najuzvišenije ljubavi i najdubljeg poštovanja. Nemoguće je postići potpuno obožavanje i ljubav prema Allah osim kroz ljubav prema onome što On voli, i mržnju prema onome što On prezire, a jedini put ka spoznaji onoga što On voli i prezire jeste put Njegovog Poslanika, sallallahu alejhi ve sellem, a taj put podrazumijeva slijeđenje njegovih naredbi i izbjegavanje njegovih zabrana.

Stoga, ljubav prema Allahu podrazumijeva ljubav prema Njegovom Poslaniku, sallallahu alejhi ve sellem, vjerovanje u njega i slijeđenje njegovog puta.

A budući da je Džennet prebivalište trajne sreće, uzvišenog položaja i dragocjene vrijednosti, njegova cijena jesu ove plemenite i veličanstvene riječi – "la ilahe illallah". Te riječi, kada se njihovo značenje učvrsti u srcima, one ih napoje svojom svježinom i obasjaju svojim svjetlom.

Enes b. Malik, radijallahu anhu, prenosi da je Muaz, radijallahu anhu, jahao iza Poslanika, sallallahu alejhi ve sellem, na jahalici, pa mu je Allahov Poslanik rekao: "O Muaze ibn Džebele!" Muaz je odgovorio: "Odazivam ti se, o Allahov Poslaniče, i spreman sam!" Poslanik, sallallahu ponovo ga je pozvao: "O Muazel!" Muaz je opet rekao: "Odazivam ti se, o Allahov Poslaniče, i spreman sam!"

To se ponovilo tri puta, a zatim je Poslanik, sallallahu alejhi ve sellem, rekao: "Nema nijedne osobe koja iskreno, iz srca, posvjedoči da nema boga osim Allaha i da je Muhammed Allahov poslanik, a da je Allah neće zabraniti Vatri."

Onaj ko izgovara ove riječi bit će i najsretniji čovjek jer će postići šefat, zauzimanje, Allahovog Poslanika, sallallahu alejhi ve sellem.

Ebu Hurejra, radijallahu anhu, rekao je: "O Allahov Poslaniče, koga će najviše obradovati tvoj šefat na Sudnjem danu?" Poslanik, sallallahu alejhi ve sellem,





odgovorio mu je: "Očekivao sam, o Ebu Hurejra, da ćeš ti prvi postaviti to pitanje, zbog tvoje želje za hadisima. Najsretniji zbog mog šefata na Sudnjem danu bit će onaj ko izgovara: 'la ilahe illallah' iskreno, iz dubine svoga srca."

Neka nam Allah podari blagoslov u Kur'anu i sunnetu, i neka učini bogobožnost našom opskrbom i štitom.

O vjernici i vjernice, riječi tevhida i iskrene vjere nisu puko izgovorena fraza, koja prelazi preko usana i ponavlja se u govoru. To su veličanstvene riječi čiji su tragovi duboki, a plodovi obilni. Uzvišeni Allah kaže: "Zar ne vidiš kako Allah navodi primjer – lijepa riječ kao lijepo drvo: korijen mu je čvrsto u zemlji, a grane prema nebu; ono plod svoj daje u svako doba koje Gospodar njegov odredi – a Allah ljudima navodi primjere da bi pouku primili." (Ibrahim, 24–25)

Te riječi su poput raskošnog drveta pod kojim duša, umorna od tereta života, spušta svoje breme, a ono joj pruža plodove i širi hlad. Kada se njihovo značenje učvrsti u dubinama srca, smiruju se osjećaji, duša pronalazi spokoj, duh se umiruje, i sve to pozitivno se reflektuje na nutrinu i srce, u vremenu ubrzanog života, punog promjena i utjecaja. U vrevi života i njegovim izazovima, one su utjeha onome ko pati, sigurnost onome ko se boji. Dolaze srcima poput svježeg povjetarca u vreli dan. Srce ispunjeno doktrinom tevhida smiruje se pred Allahovim odredbama i ostaje spokojno pred promjenama ovog svijeta, jer zna da ima Uzvišenog Gospodara kod Kojeg je sve određeno s mjerom.

Ibn Abbas, radijallahu anhumu, prenosi da je Allahov Poslanik, sallallahu alejhi ve sellem, u trenucima tegobe, govorio: "Nema boga osim Allaha, Uzvišenog i Blagog. Nema boga osim Allaha, Gospodara Arša Uzvišenog. Nema boga osim Allaha, Gospodar nebesa i Zemlje, i Gospodar Arša Plemenitog."

Zato, neka vaši jezici neprestano izgovaraju ove riječi u zikru, a srca neka budu ispunjena njenim značenjem s čvrstim ubjeđenjem.

Allahu, podari da živimo s tevhidom (čistom vjerom u jednog Boga) i da umremo s tevhidom. Upiši nam, iz Svoje dobrote, najljepše nagrade i još više od toga.





Povećajte salavate i selame na najbolje stvorenje i najodabranijeg čovjeka, u ovom danu i svim danima, jer Poslanik, sallallahu alejhi ve sellem, kaže: "Zaista je jedan od vaših najboljih dana petak, pa mnogo donosite salavat na mene tog dana, jer vaš salavat mi se izlaže."

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

